

AUGLÝSING

um fjárfestingarsamning milli ríkisstjórnar Íslands og Marmeti ehf.

Hinn 28. janúar 2013 var undirritaður fjárfestingarsamningur milli ríkisstjórnar Íslands og Marmeti ehf. um uppsetningu og rekstur fiskvinnslu í Sandgerði á Íslandi.

Samkvæmt 4. mgr. 21. gr. laga nr. 99/2010 um ívilnanir vegna nýfjárfestinga á Íslandi, með síðari breytingum, skal samningurinn birtur í B-deild Stjórnartíðinda og er hann fylgiskjal með auglýsingu þessari.

Atvinnuvega- og nýsköpunarráðuneytinu, 7. febrúar 2013.

F. h. r.

Kristján Skarphéðinsson.

Þórður Reynisson.

Fylgiskjal.

FJÁRFESTINGARSAMNINGUR
MILLI
RÍKISSTJÓRNAR ÍSLANDS
og
MARMETI EHF.

Fjárfestingarsamningur þessi, gerður hinn 28. janúar 2013 („**fjárfestingarsamningurinn**“ eða „**samningurinn**“),

af og á milli

ríkisstjórnar Íslands (hér eftir „**ríkisstjórnin**“), með skrifstofur að Arnarhváli, Lindargötu, 150 Reykjavík, en atvinnuvegaráðherra kemur fram fyrir hönd þess,

Marmeti ehf., sem er einkahlutafélag, stofnað og starfrækt skv. íslenskum lögum, kt. 580512-0380, með skráð aðsetur að, Hafnargötu 3, Sandgerði (hér eftir „**félagið**“)

Hér eftir er einnig vísað sameiginlega til framangreindra sem „**aðila**“ og er hver um sig „**aðili**“.

MEÐ ÞVÍ AÐ ríkisstjórnin og félagið (svo sem það er skilgreint hér á eftir) hafa komist að grundvallarsamkomulagi varðandi framkvæmd verkefnis, sem felst í uppsetningu fiskvinnslu á Ísland, eftir því sem reglur um ríkisaðstoð heimila;

MEÐ ÞVÍ AÐ ríkisstjórnin hefur einsett sér að hvetja til fjárfestingar og framkvæmda á Íslandi, með áherslu á verkefni sem munu hafa jákvæð efnahagsleg áhrif til framtíðar og stuðla að fjölbreyttara atvinnulífi á Íslandi;

MEÐ ÞVÍ AÐ félagið hefur unnið að nauðsynlegri undirbúningsvinnu, sem miðar að uppsetningu og rekstri fiskvinnslu í Sandgerði á Íslandi (hér eftir nefnt „**verkefnið**“);

MEÐ ÞVÍ AÐ eftir nauðsynlega athugun á fjárhagslegri hagkvæmni verkefnisins við núverandi og fyrirsjáanlegar efnahagslegar aðstæður hefur aðilum orðið ljóst að til þess að verkefnið geti orðið að veruleika sé nauðsynlegt að þeir geri með sér þennan fjárfestingarsamning með það að markmiði að láta í té nauðsynleg tæki til þess að unnt verði að hrinda verkefninu af stað og ljúka því;

MEÐ ÞVÍ AÐ félagið vinni að því að þróa, byggja og starfrækja fiskvinnsluna með það að markmiði að hefja starfsemi árið 2013;

Fjárfestingarsamningur þessi á sér lagastoð í lögum nr. 99/2010, um ívilnanir vegna nýfjárfestinga á Íslandi. Í samræmi við lög nr. 99/2010 varðar fjárfestingarsamningurinn aðeins nýbyggingar húsnæðis fyrir fiskvinnsluna og rekstur fiskvinnslunnar sem hefur ekki hafið starfsemi.

OG ÞVÍ ERU aðilar sammála um að formáli fjárfestingarsamnings þessa sé óaðskiljanlegur hluti hans og hafa ennfremur gert með sér eftirfarandi samning:

1. gr.

Skilgreiningar og túlkun.

1.1. Alls staðar þar sem eftirfarandi hugtök koma fyrir í samningi þessum, skulu þau hafa þá merkingu sem tilgreind er hér á eftir:

i) *Alþingi:*

Löggjafarsamkoma Lýðveldisins Íslands.

ii) *Ríkisstjórn:*

Ríkisstjórn Lýðveldisins Íslands ásamt öllum ráðuneytum hennar og stofnunum.

iii) *Lög um ívilnanir vegna nýfjárfestinga:*

Lög nr. 99/2010, um ívilnanir vegna nýfjárfestinga á Íslandi.

iv) *Félagið:*

Marmeti ehf., einkahlutafélag, stofnað og starfrækt samkvæmt íslenskum lögum.

v) *Fjárfestingarsamningur eða samningur:*

Þessi samningur, nema annað sé tilgreint í samningi þessum.

2. gr.

Uppbygging, tilgangur og undanþágur.

2.1. Marmeti hefur stofnað félagið sem mun eiga og reka fiskvinnslu á Íslandi samkvæmt íslenskum lögum, eins og nánar er kveðið á um í lögum nr. 138/1994, um einkahlutafélög, og eins og gert er ráð fyrir í samningi þessum, og eru, á samningsdegi eða fyrir samningsdag, einu hluthafarnir.

2.2. Tilgangur félagsins er að reka fiskvinnsluna í Sandgerði þar sem nýr tækjabúnaður verður nýttur til að ná að vinna fiskafurðir á sem hagkvæmastan hátt. Félagið stefnir að því að hefja starfsemi sem fyrst og skapa atvinnu á svæðinu.

2.3. Ríkisstjórnin mun tryggja að félagið og fjárfestirinn njóti allra réttinda og hagræðis, sem fjárfestingarsamningur þessi veitir, og að engin ráðstöfun verði gerð er gæti takmarkað eða á annan hátt haft neikvæð áhrif á framkvæmd verkefnisins og starfsemi fjárfestisins eða félagsins eða á annan hátt fyrirgirt réttindi og hagræði sem fjárfestinum og félaginu eru veitt skv. fjárfestingarsamningi þessum.

3. gr.

Framsal hlutabréfa.

3.1. Samþykki ríkisstjórnarinnar er áskilið fyrir framsali hlutabréfa í félaginu þar til og eftir að rekstur er hafinn í félaginu á meðan ívilnanir, frávik, undanþágur og önnur ákvæði í samningi þessum eru í gildi. Ef samþykkis er ekki leitað eða ef ríkisstjórnin synjar nýjum framsalshafa um leyfi til að ganga inn í samning þennan falla niður frekari ívilnanir til félagsins samkvæmt samningi þessum. Ekki skal synja um slíkt samþykki eða draga það að ástæðulausu þegar um er að ræða:

a) framsal minnihlutaeignar, sem ekki er umfram 49% í heild, til félags eða félaga sem skráð eru í ríkjum innan OECD, eða

b) veðsetningu á öllum eða einhverjum hlutabréfum til tryggingar á láni sem veitt er félaginu eða venslafyrirtækjum þess og/eða félagsins til þess að auðvelda því að framkvæma verkefnið, eða sala á slíkum hlutabréfum skv. veðsetningunni til félags eða félaga sem skráð eru í ríkjum innan OECD.

- 3.2. Nú kemur til framsals á hlutabréfum í félaginu og skal þá framsalshafinn verða aðili að samningi þessum á grundvelli útgáfunnar eða framsalsins, og skal staðfesta það sérstaklega með því að undirrita og afhenda ríkisstjórninni skriflega yfirlýsingu með því formi sem ríkisstjórnin, félagið og fjárfestarnir geta fallist á, þar sem félagið, sem eignaðist hlutabréfin, samþykkir skilmála og ákvæði þessa samnings og skuldbindur sig til að hlíta þeim í einu og öllu.

4. gr.

Starfsemin.

- 4.1. Félagið hyggst hefja starfsemi í byrjun árs 2013.
- 4.2. Reynist nauðsynlegt fyrir félagið að fá frá ríkisstjórninni samþykki eða leyfi, sem ekki hafa verið gefin út eða ekki er þörf á á þeim degi sem samningur þessi er undirritaður, skal ríkisstjórnin svo fljótt sem unnt er gera það sem í hennar valdi stendur til að aðstoða félagið við að hljóta slíkt samþykki eða leyfi í samræmi við landslög.

5. gr.

Umhverfismál.

- 5.1. Félagið skal fara eftir þeim lögum og reglum sem almennt gilda á Íslandi í tengslum við umhverfismál s.s. hollustuhætti og vernd umhverfis.

6. gr.

Meginreglur og framkvæmd skattlagningar.

- 6.1. Félagið skal greiða skatta og önnur opinber gjöld, sem almennt eru á lögð á Íslandi, eftir þeim reglum sem um þau gilda samkvæmt lögum á hverjum tíma, nema að því leyti sem á annan veg er mælt í samningi þessum.
- 6.2. Almenn ákvæði íslenskra laga um tekjuskatt, virðisaukaskatt og gjöld sem sveitarfélög leggja á og í gildi eru á hverjum tíma og varða skattframtal, framtalsfrest, álagningu, endurskoðun, endurálagningu, innheimtu, gjalddaga og greiðslu, sem og aðrar uppgjorsreglur varðandi tekjuskatt, virðisaukaskatt og gjöld sem sveitarfélög leggja á, auk andmæla og ágreinings í tengslum við þau, skulu gilda um félagið að öðru leyti en sem kveðið er á um í samningi þessum.

7. gr.

Skattar og opinber gjöld.

- 7.1. Þrátt fyrir breytingar, sem kunna að verða á lögum nr. 90/2003, um tekjuskatt, með áorðnum breytingum, skal félagið greiða 20% tekjuskatt með eftirfarandi sérákvæðum:
- a) Ef tekjuskattshlutfall það, sem á við um hlutafélög, er lægra en 20% skal hið lægra tekjuskattshlutfall gilda um félagið á samningstímanum (eins og hann er skilgreindur í 16. gr.). Ef tekjuskattshlutfallið, sem þannig hefur verið lækkað, hækkar síðar á samningstímanum, skal hið hærri tekjuskattshlutfall gilda um félagið, en þó skal hlutfallið aldrei hærri en 20%.
- b) Varanlegir rekstrarfjármunir, sem tengjast verkefninu, teljast vera mannvirki, vélbúnaður, verksmiðja og búnaður og skulu þeir flokkaðir í samræmi við 37. og 38. gr. laga nr. 90/2003. Um fyrningu skal fara skv. 6. mgr. 7. gr. samnings þessa.
- 7.2. Stimpilgjöld, sem greiða bæri skv. lögum nr. 36/1978, um stimpilgjöld, með áorðnum breytingum, skulu vera 0,15% af öllum stimpilgjaldsskyldum skjölum, sem félagið gefur út eða stofnað er til í tengslum við byggingar fiskvinnslunnar.
- 7.3. Almenn tryggingagjald félagsins skal vera 20% lægra en það sem kveðið er á um í 3. mgr. 2. gr. laga nr. 113/1990, um tryggingagjald, með áorðnum breytingum.
- 7.4. Skattshlutfall fasteignaskatts, sem félagið greiðir, skal vera 30% lægra en lögbundið hámark skv. II. kafla laga nr. 4/1995, um tekjustofna sveitarfélaga, með áorðnum breytingum, sbr. 6. tölul. 2. mgr. 9. gr. laga nr. 99/2010.

- 7.5. Félagið skal undanþegið markaðsgjaldi skv. lögum nr. 38/2010, um Íslandsstofu, með áorðnum breytingum, svo og öðrum eins eða efnislega svipuðum sköttum eða gjöldum er kunna að verða lögð á til viðbótar við eða í staðinn fyrir markaðsgjaldið.
- 7.6. Á því ári þegar nýjar eignir eru teknar í notkun getur félagið valið að fyrna þær með hlutfalli árlegrar fyrningar í stað heils árs fyrningar eins og annars er kveðið á um í 34. gr. laga nr. 90/2003. Þrátt fyrir ákvæði 42. gr. laga nr. 90/2003 skal félaginu heimilt að fyrna eignir sínar þannig að ekki standi eftir niðurlagsverð.
- 7.7. Ríkisstjórnin skal ekki leggja skatta, tolla eða gjöld á losun lofttegunda eða aðra förgun úrgangs nema slík gjöld eða skattar séu almennt lagðir á önnur fyrirtæki á Íslandi.
- 7.8. Ríkisstjórnin skal ekki leggja nein umhverfisgjöld eða skatta, sem tengjast losun lofttegundanna CO₂, NO_x og SO₂ eða annarri losun eða öðrum mengunarefnum, á félagið nema slík gjöld eða skattar séu almennt lagðir á önnur fyrirtæki á Íslandi.
- 7.9. Ívilnanir, frávik, undanþágur og önnur ákvæði 1.-6. mgr. 7. gr. skulu halda fullu gildi í 10 ár frá þeim degi sem viðkomandi skattskylda eða gjaldskylda myndast hjá félaginu, þó aldrei lengur en í 13 ár frá undirritunardegi sammings þessa, þrátt fyrir hugsanlegar breytingar á lögum nr. 90/2003, um tekjuskatt, lögum nr. 4/1995, um tekjustofna sveitarfélaga, og lögum nr. 38/2010, um Íslandsstofu, eða neinum öðrum lögum eða reglugerðum sem annars kynnu að takmarka eða draga úr þeim áhrifum sem gert er ráð fyrir með ákvæðum 1.-6. mgr. 7. gr. Ívilnanir, frávik, undanþágur og önnur ákvæði 7.-8. mgr. 7. gr. skulu halda fullu gildi á samningstímanum sem tilgreindur er í 16. gr. sammings þessa eða öðrum lögum eða reglugerðum sem annars kynnu að takmarka eða draga úr þeim áhrifum sem gert er ráð fyrir með ákvæðum 7.-8. mgr. 7. gr.

8. gr.

Aðflutningsgjöld.

- 8.1. Innflutningur eða innkaup innanlands af hálfu eða fyrir hönd félagsins á byggingarefnum, hráefnum og öðrum framleiðsluaðföngum, sem nauðsynleg eru til rekstrar fiskvinnslunnar, vélum og búnaði og öðrum fastafjármunum og varahlutum til byggingar fiskvinnslunnar eða rekstrar hennar, skulu undanþegin íslenskum inn- og útflutningsgjöldum skv. tollalögum nr. 88/2005 og vörugjöldum skv. lögum um vörugjald nr. 97/1987, sem og sams konar eða efnislega svipuðum sköttum eða gjöldum er kynnu síðar að verða lögð á til viðbótar við eða í staðinn fyrir framangreind gjöld.
- 8.2. Ívilnanir, frávik, undanþágur og önnur ákvæði 1. mgr. 8. gr. skulu halda fullu gildi í 10 ár frá þeim degi sem viðkomandi skattskylda eða gjaldskylda myndast hjá félaginu, þó aldrei lengur en í 13 ár frá undirritunardegi sammings þessa, þrátt fyrir hugsanlegar breytingar á tollalögum nr. 88/2005, lögum nr. 97/1987, um vörugjald, og lögum nr. 50/1988, um virðisaukaskatt, eða öðrum lögum eða reglugerðum sem annars kynnu að takmarka eða draga úr þeim áhrifum sem gert er ráð fyrir með ákvæðum 1. mgr. 8. gr.

9. gr.

Aðrir skattar og gjöld.

- 9.1. Ríkisstjórnin skal ekki leggja á nein ný/frekari gjöld eða skatta í tengslum við raforkukaup og/eða notkun félagsins á samningstímanum nema slík gjöld eða skattar séu almennt lagðir á önnur fyrirtæki á Íslandi.
- 9.2. Félagið skal undanþegið ákvæðum 1., 4. og 5. tölul. 1. mgr. 14. gr. laga nr. 146/1996, um öryggi raforkuvirkja, neysluveitna og raffanga.
- 9.3. Ívilnanir, frávik, undanþágur og önnur ákvæði 2. mgr. 9. gr. skulu halda fullu gildi í 10 ár frá þeim degi sem viðkomandi skattskylda eða gjaldskylda myndast hjá félaginu, þó aldrei lengur en í 13 ár frá undirritunardegi sammings þessa um veitingu ívilnunar.

10. gr.

Reikningsskilareglur.

- 10.1. Ársreikningar félagsins skulu gerðir á grundvelli reikningsskilareglna sem gefnar eru út á grundvelli landslaga og fyrirmæla alþjóðlegu reikningsskilanevndarinnar.
- 10.2. Félaginu er heimilt að skrá öll viðskipti sín og gefa út ársreikninga sína í evrum eða annarri mynt að eigin vali í samræmi við landslög.

11. gr.

Endurskoðun skatta- og styrkjafyrirkomulags.

- 11.1. Á samningstímanum getur félagið valið að almenn ákvæði íslenskra skattalaga, eins og þau eru á hverjum tíma, gildi um það. Beiðni um slíka breytingu skal lögð fram skriflega eigi síðar en 1. júní þess almanaksárs sem fer á undan því almanaksári sem breytingin á að taka gildi. Berist slík beiðni, skulu aðilar þegar ganga til samninga um breytinguna yfir í hið almenna skattakerfi skv. nefndum lögum. Aðilar skulu koma sér saman um aðferðir við framkvæmd slíkrar breytingar. Eftir það skal félagið lúta almennum íslenskum skattalögum það sem eftir er af gildistíma samnings þessa.
- 11.2. Verði í boði stofnfjárstyrkir eða niðurgreiðslur vegna þjálfunarkostnaðar eða sambærilegs kostnaðar í samræmi við lög um ívilnanir vegna nýfjárfestinga á félagið rétt á því að sækja um slíka styrki.

12. gr.

Staða samninga að lögum.

- 12.1. Samningur þessi skal birtur í heild sinni í B-deild Stjórnartíðinda á íslensku til upplýsingar strax eftir undirritun hans af hálfu aðila. Birting samningsins skal þó eigi vera skilyrði fyrir gildistöku hans. Hið sama skal eiga við um hverjar þær breytingar sem aðilar kunna síðar að gera á samningnum í samræmi við ákvæði hans.

13. gr.

Fyrirheit af hálfu ríkisstjórnarinnar.

- 13.1. Ríkisstjórnin mun gera allar nauðsynlegar ráðstafanir til þess að tryggja að félagið njóti allra réttinda og hagræðis, sem samningur þessi veitir, og að engin ráðstöfun verði gerð er gæti takmarkað eða á annan hátt haft neikvæð áhrif á framkvæmd verkefnisins og starfsemi félagsins í tengslum við verkefnið eða að öðru leyti. Í þessu skyni hefur ríkisstjórnin einsett sér að tryggja og viðhalda lagaumhverfi sem er sambærilegt við það sem almennt gerist í aðildarríkjum EES.

14. gr.

Lög sem gilda og deilumál.

- 14.1. Um samning þennan og túlkun hans fer skv. íslenskum lögum. Ef annað er ekki sérstaklega tekið fram í samningi þessum skulu íslensk lög og reglugerðir gilda og rísi mál út af samningi þessum skal það rekið fyrir íslenskum dómstólum.

15. gr.

Óviðráðanleg öfl (force majeure).

- 15.1. Í samningi þessum eru óviðráðanleg öfl hér með skilgreind á þann veg að þau taki til ófriðar (hvort sem um stríðsyfirlýsingar er að ræða eða ekki), styrjaldaraðgerða, hersetu, byltinga, uppreisna, borgarastyrjalda, óeirða, uppþota, fjöldauppnáms, múgæsinga, sjóránsaðgerða, skemmdarverka, geislavirkni, farsóttá, sprenginga, eldsvoða, jarðskjálfta, eldgosa, storma, flóðbylgja, flóða, mikillar ísingar, þurrka, eldinga, sóttkvía, flutningsbanna, almennrar stöðvunar á flutningum eða siglingum, eða hvers kyns ámóta tilvika, sem ekki er unnt að koma í veg fyrir eða hafa stjórn á með eðlilegum ráðum af hálfu þess aðila sem fyrir verður, og í þessu tilliti skulu óviðráðanleg öfl einnig taka til allsherjarverkfalla, staðbundinna verkfalla, viðskiptabanna, verkabanna eða ámóta vinnutruflana á Íslandi eða annars staðar, sem

aðili sá á Íslandi, sem ber fyrir sig óviðráðanleg öfl og fyrir slíku verður, hefur ekki getað komið í veg fyrir eða haft stjórn á þótt hann hefði beitt öllum eðlilegum ráðum, sem honum voru tiltæk (þó með þeim fyrirvara að engum aðila er skylt að leysa slíkar vinnudeilur), en eingöngu um þann tíma sem aðilanum var ókleift að binda enda á ástandið með öllum raunhæfum ráðum sem honum voru tiltæk.

- 15.2. Eigi skal misbrestur eða aðgerðarleysi af hálfu aðilanna um að efna nokkra skuldbindingu sína samkvæmt samningi þessum teljast vanefnd á slíkri skuldbindingu ef og að því leyti, sem slíkur misbrestur eða aðgerðarleysi er af völdum óviðráðanlegra afla.
- 15.3. Sá aðili sem bera vill fyrir sig óviðráðanleg öfl samkvæmt þessari grein skal hafa sönnunarbyrði um tilvist slíkra óviðráðanlegra afla. Misbrestur eða aðgerðarleysi skal, að því er grein þessa varðar, því aðeins teljast vera af völdum óviðráðanlegra afla að sá aðili, sem hlut á að slíkum misbresti eða aðgerðarleysi, sanni (a) að misbrestur hans eða aðgerðarleysi sé bein afleiðing af óviðráðanlegum öflum eins og þau eru skilgreind í 1. mgr. 15. gr. hér að framan, og (b) að hann hafi sýnt hæfilega aðgæslu og gripið til allra annarra ráða, sem eðlileg mega teljast, til þess að forðast slíkan misbrest eða aðgerðarleysi.
- 15.4. Sérhver aðili samnings þessa skal tafarlaust tilkynna hinum um óviðráðanleg öfl, sem valda misbresti eða aðgerðarleysi um að efna eigin skuldbindingar hans samkvæmt samningi þessum. Jafnframt skal sá aðili gera allar raunhæfar ráðstafanir til að minnka áhrif af misbresti eða aðgerðarleysi að efna eigin skuldbindingar að fullu. Sá aðili sem ber fyrir sig óviðráðanleg öfl skal tilkynna hinum aðilanum þegar viðkomandi aðstæðum af völdum óviðráðanlegra afla er lokið og gera allar raunhæfar ráðstafanir, sem í hans valdi standa, til að hefjast handa um að efna að nýju skuldbindingar sínar samkvæmt samningi þessum með sem minnstum mögulegum tögum.

16. gr.

Samningstími.

- 16.1. Samningur þessi tekur gildi á dagsetningu undirritunar hans af hálfu aðila.
- 16.2. Samningur þessi skal haldast í gildi í þrettán (13) ár eftir að hann gengur í gildi. Undanþágur frá sköttum og gjöldum, sem kveðið er á um í 1.-6. mgr. 7. gr., 1. mgr. 8. gr. og 2. mgr. 9. gr. samningsins, skulu gilda í 10 ár frá þeim degi sem viðkomandi skattskylda eða gjaldskylda myndast, þó aldrei lengur en í 13 ár frá undirritun fjárfestingarsamningsins.

17. gr.

Framsal.

- 17.1. Réttindi og skyldur samkvæmt samningi þessum skal enginn aðili geta framselt, afsalað sér eða falið öðrum án samþykkis hinna aðilanna, sbr. þó 3. gr. og 2. mgr. 17. gr. Eigi skal synja um slíkt samþykki eða draga það að ástæðulausu.
- 17.2. Þrátt fyrir ákvæði 1. mgr. 17. gr. er félaginu, og eftir atvikum eigendum þess, heimilt að framselja réttindi og skyldur samkvæmt samningi þessum, án samþykkis ríkisstjórnarinnar, til fjármálastofnana sem tryggingu fyrir hvers kyns fjármögnun er tengist verkefninu. Að áskildu því að beinn samningur verði gerður milli ríkisstjórnarinnar og viðkomandi fjármálastofnana, skal ríkisstjórnin, hafi verið gengið að tryggingunni, samþykkja framsal réttinda og skyldna félagsins og/eða fjárfestanna samkvæmt samningi þessum til fjármálastofnana, sem eru veðhafar, eða frekari sölu af hálfu fjármálastofnananna til aðila sem eignast hlut félagsins og/eða fjárfestanna í verkefninu og uppfyllir þau skilyrði sem sett eru um eigendur í 5. gr. laga nr. 99/2010.

18. gr.

Breytingar og endurskoðun.

- 18.1. Samningi þessum verður aðeins breytt með skriflegum og löglega undirrituðum viðaukasamningi sem aðilar gera með sér.
- 18.2. Við gerð samnings þessa viðurkenna aðilar að ekki sé raunhæft að hyggjast setja fram ákvæði um hvernig bregðast skuli við öllu því sem upp getur komið á gildistíma hans. Lýsa aðilar yfir

þeim ásetningi sínum að samningnum verði beitt með sanngirni í skiptum þeirra og án þess að hagsmunir annars hvors þeirra bíði tjón af, þegar tekið er tillit til þess hvernig skipt er því hagræði og þeirri áhættu sem af honum leiðir.

19. gr.

Tilkynningar.

- 19.1. Hvers kyns tilkynningar, sem áskildar eru eða heimilaðar samkvæmt samningi þessum, skulu sendar bréfleiðis eða með tölvupósti eða bréfsíma og staðfestar skriflega eða með svari og teljast gildar og fullnægjandi ef þær eru sendar með ábyrgðarflugpósti að greiddu burðargjaldi eða með bréfsíma og staðfestar í ábyrgðarflugpósti með eftirfarandi utanáskrift:

Til ríkisstjórnarinnar:

Atvinnuvega- og nýsköpunarráðuneytið
Skúlagötu 4
150 Reykjavík
Bréfsími: 354 552 1160

Til félagsins:

Marmeti ehf.
Hafnargötu 3
245 Sandgerði
Íslandi

eða með annarri utanáskrift, tölvupóstfangi og/eða bréfsímanúmeri, sem viðkomandi aðili kann að tilkynna hinum aðilunum um með þeim hætti sem kveðið er á um hér að framan.

- 19.2. Aðili, sem rétt á til tilkynningar, sem krafist er eða heimiluð í samningi þessum, getur afsalað sér þeim rétti skriflega, hvort sem er fyrir eða eftir að hennar er krafist eða hún heimiluð.
- 19.3. Tilkynningar samkvæmt samningi þessum skulu teljast hafa verið veittar þegar tíu (10) almanaks dagar eru liðnir frá póstlagningu eða tveir (2) dagar frá sendingu með bréfsíma, enda hafi í tilvikum þegar um símbréf er að ræða í raun borist staðfesting á tilkynningunni með ábyrgðarbréfi. Tilkynning með tölvupósti telst gefin á þeim degi sem móttakandi svarar.

20. gr.

Ýmis ákvæði.

- 20.1. Fjárfestingarsamningur þessi skal undirritaður og afhentur af aðilum í tveimur (2) eintökum. Sérhvert eintak telst frumrit og jafngilt hinum eintökunum.
- 20.2. Fjárfestingarsamningur þessi er undirritaður á grundvelli laga nr. 99/2010, um ívilnanir vegna nýfjárfestinga á Íslandi, sbr. og reglugerðir sem settar eru með stoð í þeim lögum. Í lögnum er að finna áætlun um ríkisaðstoð, sem tilkynnt hefur verið Eftirlitsstofnun EFTA (ESA) og hlotið þar samþykki. Framkvæmd áætlunarinnar um ríkisaðstoð og veiting fjárfestingaraðstoðar er háð árlegum skýrslum til ESA og eftirliti ESA með beitingu áætlunarinnar um ríkisaðstoð.
- 20.3. Til tryggingar á rétttri notkun ívilnana skv. samningi þessum ber félaginu að senda atvinnuvegaráðuneytinu árlega skýrslu um framvindu fjárfestingarverkefnisins, hlut ívilnunar í framgangi þess, samtals fjárhæð veittrar ríkisaðstoðar á undanfögnu ári og tilgreiningu á annarri starfsemi aðila ef einhver er.
- 20.4. Fella ber niður ívilnanir skv. samningi þessum og endurkrefja um þegar veitta ívilnun komi í ljós að félagið eða fjárfestar hafi vísvitandi veitt rangar upplýsingar eða leynt upplýsingum sem höfðu áhrif á veitingu ívilnunarinnar. Endurkrefja ber um ívilnun ef hún hefur verið nýtt til annarra hluta en fjárfestingarverkefnis þess sem var forsenda veitingar hennar.
- 20.5. Komi í ljós að ívilnun skv. samningi þessum er komin umfram þær heimildir sem fram koma í lögum nr. 99/2010 eða samningi þessum skal endurkrefja félagið um þann hlut sem umfram er og stöðva veitingu frekari ívilnunar.

- 20.6. Ef ákvörðun um ívilnun er afturkölluð samkvæmt grein þessari eða í kjölfar ákvörðunar Eftirlitsstofnunar EFTA um ólögmdæta ríkisaðstoð, skulu stjórnvöld, sbr. 3. mgr. 31. gr. samkeppnislaga, nr. 44/2005, gera ráðstafanir til þess að endurheimta veitta ríkisaðstoð frá þiggjanda hennar.
- 20.7. Ef breytingar eru gerðar á lögum nr. 99/2010, sem félagið telur að kveði á um ívilnanir umfram þær sem þegar er gert ráð fyrir í lögnum, skal ríkisstjórnin, að beiðni félagsins, breyta samningi þessum og veita félaginu hinar nýju ívilnanir, sem skulu ganga í gildi frá undirritunardegi hins breytta samnings.

ÞESSU TIL STAÐFESTU hefur samningur þessi verið undirritaður fyrir hönd ríkissjóðs og félagsins þann dag sem í upphafi greinir, í tveimur eintökum.

Fyrir hönd ríkisstjórnar Íslands,

Steingrímur J. Sigfússon atvinnuvega- og nýsköpunarráðherra.

Marmeti ehf.

Örn Erlingsson stjórnarmaður.